

## MILLENNIUMS-KERWEREDD 2000

Ihr lieve Leit, ich grüß euch fröhlich,  
ich muß gestehe, ich bin so selig,  
unn häß eich willkomme, ich bin jo net dumm,  
zur Kerwe „de Millenium“!  
Millenim, das war das Wort,  
net nur in Nerrermohr, nä, in jedem Ort.  
An Neijohr herrschde e große Not,  
lebt noch de Computer, orrer isser schunn dot?  
Laaft de Strom noch durch's Kabel unn macht Rabbatz,  
orrer iss schunn die Wasseruhr geplatzt?  
Doch dann war's wie e großes Wunner,  
ess Johr 2000 ging net die Bach enunner!  
In dere Nacht hat's nur e paar getroff,  
doch das war kä Stromausfall, die ware besoff!  
Jetzt dun met uns die Kerb 2000 feiere,  
unn es gebt kä Grund, sich heit zu eiere.  
Die Musik schpeelt nun frei und frank:  
„Am 31. Dezember war kä Weltunnergang!“

Straußbuwe...

2000 Johr, unn es war net immer Ruhe unn Friede,  
2 schlimme Kriege ware uns a beschiede.  
Verlor hann mer die an noch, was fer Quale,  
am letschde dun mer immer noch bezahle.  
Doch dann hat's Ruh gebb, sie ware vorbei, die Zeide, die miese,  
mer wolle werrer feiere, das war unser Devise.  
De Wille war do, die Zeide warn herb –  
Doch dann wurd se gehall, Oktober `46, die erschd Kerb!  
Mer hert heit noch die Alde verzehle,  
wie se sich frieher mussde quäle.  
Doch im Oktober, do leit die Arwett brach,  
denn die Kerb war de höchschde Feiardach!  
Vunn de Uroma bis zum Enkelche war alles organisiert,  
vier Daa hann die gefeiert ganz ungeniert.  
Zum Glick hat sich de Brauch bis heit gehall,  
doch jetzt ertönt im Sommer schunn der Schall,  
ess 1. Wochenend im Juli geheert ganz Nerrermohr,  
do iss heit noch jung unn alt devor!  
Die Musik schepeelt jetzt allgemein:  
„Schön isses, auf der Welt zu sein!“

Straußbuwe...

Weber's Linde vunn de Metz hat uns gebb  
e Kerweredd, die wurd 1960 nerrergeschrebb.  
Die Redd hot alle Leit gut gefall  
Unn wurd am 17. Oktober 1960 gehall!  
Jetzt bassen uff, was drin kommt vor,  
vunn manche Leit aus Nerrermohr!  
Seit Johre gebt's e großes Geschrei  
um die Wasserleidungsbauerei.  
Der äne redd hin, der anner her,  
der dritte kreischt sogar noch mehr.  
De Gemänerat steht Gewehr bei Fuß,  
das Ding zu knacke iss e harte Nuß.  
Do springt de Bürgermeister uff de Disch:  
„Ruhe jetzt, alleweil redd ich!  
Die Wasserleitung wird gebaut,  
wenn's Geld net langt, werds beim Staat geklaut!“  
Unn jetzt beginnt die nei Epoche,  
ess Wasser laaft seit einer Woche.  
Die Musik scheeelt em gemänerat met Trara:  
„Wasser iss zum Wasche da!“

Straußbuwe...

Unn noch e Redd met veel Querele,  
war 1964 beim Allendorf zu heere.  
Ehr Leit, jetzt höre nemol allegar doher,  
do steht schun was vun de Niedermohrer städtische Feierwehr.  
Wie's vergange do vorre an de Miehl hat selle brenne,  
do hat mer se kenne sieh de Gensehiwel enuff un e runner renne.  
E Inspektion muss jo a alsemol sinn,  
awer bei de letscht, do war de Wurm ganz drinn.  
Bei de letscht Besichtigung wollte se met de Motorspritz groß spritze,  
awer de Inspektor wollt jo vun denne Leit was wisse.  
Ke enner hat was gewisst,  
allegar hanse do gestann, wie e Bock wanns blitzt.  
De Inspektor hat se unner annerem a noch gefroht weiter,  
wie spritz mer dann e Haus ohne Leiter?  
Do hat de Kommandant zur Antwort geb,  
do mache mehr e Spitzbuweleitertrepp.  
Do stellt sich enner uff de anner  
unn ich stell mich unne drunner.  
Wann se all drowe sinn, ruf ich enuff,  
halle eich fescht, ich drehe es Wasser uff.  
Ihr Musikande blose ver die Feierwehr in eier Instrumente ninn,  
wanner nochemol die Motorspritz laafe losse, brauchener a Benzin.

Straußbuwe...

Beim Studiere vunn alte Redde iss mer uffgefall,  
Strasser's Stephan hat oft die Kerb gehall.  
Doch so e mancher Name bleibt ungenannt,  
weil uff der Kerweredd steht „Name unbekannt“.  
Doch bringt mich das uff enner Plan,  
bei alle meine Vorgänger will ich „Danke“ saan.  
Vunn de 70er Johre iss uns a ebbes zugeflo,  
do wird a e mancher ess Fell iwwer die Ohre gezoo.  
Ess kommt jetzt ebbes iwwer e Mann aus Nerrermohr,  
denne kenne ehr all, also sinn ganz Ohr.  
Vorhin iss do unne enner derbber iwwer de Platz gerennt,  
mer had grad gemennt - demm had ebbes gebrennt.  
Sunnachs mojens kummt er derbber uff die Fels getrollt  
unn frot glei, ob de Rubel rollt.  
Dann zieht er derbber finf Kimmerling ab  
unn schnell gehts iwwenaus im Trabtrab.  
Er schpringd derbber zumm Schrotthännler owwenaus  
unn saad, kumm zieh mer emol de Bulldogg eraus.  
Deledschd wolld er derbber was bringe  
unn had vesucht, metnem Baam se ringe.  
Er had derbber vesucht, das Ding se wenne,  
doch der scheint sei Vehikel schlecht se kenne.  
Das Gefährt had derbber e Schlenger geschlaa,  
do war demm Ringer sei Brill nimmi da.  
Do had ne de Bulldogg so komisch gekribbelt,  
do hadener derbber vunn sisich geschittelt.  
Drummm loss das enne saa - mer soll net alles derbber, derbber mache,  
do bassere a net so Sache.  
Die Geschichte, die ehr do geheert,  
war 1977 basseert!  
Ehr Musikande speele jetzt derbber:  
„Gebe dem Mann schnell was se trinke, sunschd vederder!“

Straußbuwe...

Dann iss bei uns do feschtgehall,  
bis 1986 wurd e Kerweredd gehall!  
Ich will eich noch e bißje quäle  
unn e Geschicht vunn 1983 verzähle!  
Do owwe im scheenen Weenerstaal,  
do hammer a e gans besonnerer Fall.  
E Bundeswehrsoldad in foller Kluffd  
iss meischdens anoch voll der Schuffd.  
De Bund, der hadd ne so erfreid,  
dass er sich glei veflicht had uff Zeid.  
Memm Audo dut er gans schä rase  
unn globbt a sunschd ahaufe Frase.  
Bei soner nächdlichen Raserei  
kaam er a mol in Etschbersch vorbei.  
Die Kurf wurd uff ähmol immer steiler,  
do wars bassert, er rammt de Peiler.  
Er iss dann a noch in de Vorgarde eninngesfaar,  
de Hausbesizer wollt emm an de Kraa.  
De Taunus unn de Vorgarde ware gans schah hinn,  
das wärd demm Bersch hoffendlich e Lere sinn.  
Wissener, wer do iss gemennt,  
hann ehr denne Borsch gekennt?  
Die Musiker schpeepe dem Mann ganz lieb:  
„Denn ich bin Bundeswehrsoldat, ein toller Typ!“

Straußbuwe...

Dann war's werrer soweit,  
1989 war werrer Kerb, ess wurd langsam Zeit.  
3 Jahr hott die Kerb geschloof,  
dann hann'se die Landfraue unn es  
Poscht Margot werrer eraus gehol.  
Das hott's in Nerrermohr noch net gebb,  
Fraue hann die Kerb geschrebb.  
Enni Geschicht muß ich do wähle,  
das dun die Leit heit noch verzähle.  
Es war Montachmorgens, ich guck grad es Fenschder enaus  
un sieh wie e Wutz drauß in unserm Vorgarde haust.  
Un hinnerher sinn gerennt voller Eifer  
de Otto, de Gesell unn de Meischder.  
Vorsichtisch hau se sich a'gepirscht, met allerhand psichologische Tricks,  
Doch wie das die Sau gespannt hot, wars met dem infange nix.  
Do hat se quiekend reisaus genumme,  
de Vesuch der war mißlunge.  
Ich kann eich saa, das war e Nummer,  
de Vorgarde nuff, de Vorgarde nunner.  
Uff emol, do macht de Meischder e Satz,  
do hat er die Sau an de Ohre gehad.  
De Gesell, der steht met em Strick schun parat  
unn binnt ne klei am Hinnerlaaf a.  
Doch plötzlich, ich sahns eich, ehr Leit, es iss kä Stuß,  
do leit de Kalli unner de Wutz.  
Er halt se an de Vorderleif met ledschder Kraft,  
ich denk noch fer mich, ob er das wohl schafft.  
Dann kreischd de Otto: „Was soll dann das werre?“,  
do loßt de Gesell es Strickelche werrer schnerre.  
Do wetzt die Wutz - es waggele die Wade  
schnurstracks an de Kinnergarde.  
Fun dort aus han se se dann met ein Ämer uff de Schniss  
hinnersich werrer rumgeriss.  
Die Musik speelt denne Metzjer galant:

„Wie mer die Wutz iwwer die Krautbitt spannt!“

Straußbuwe...

Ess gab in Nerrermohr plötzlich e Knall,  
die Kerb wurd an de Feierwehr abgehall!  
Die vier Vereine wolldens zusamme versuche,  
unn vunn de Landfraue gab's ess erschde Mol Kaffee un Kuchel!  
Met enner Geschicht geh ich do zur Sache,  
iwwer die Story du ich heit noch lache.  
Ess Liewesläwe inn Nerremohr  
iss schwer gesteert, jo, ess iss wohr.  
Das zieht sich schunn seit Monate hie,  
kä Wunner, daß mehr do kä kinner mä krie.  
Denn will de Babbe mojens de Mamme an die Wäsch,  
do werd drauß uff de Stroß schunn laut gekräsch.  
Die Mamme schreckt zusamme unn will sich's grad üwwerlee,  
hört mer schunn laut e Bulldog vorriwwer ziehe.  
Töff, töff, töff, so schallt's uff de Stroße,  
de Babbe hat genung unn steiht in die Hose. -  
Er reißt's Fenschder uff - unn was sieht er da?  
Ei so werre in Nerremohr die Zeitunge ausgetra.  
Daß geht so mojens vunn fünf bis siwwe,  
do sieht mer nur noch de Bulldog rumschwirre.  
Henn, henn, henn, - schallt's in ganz Nerremohr,  
egal ob's naß iss orrer gefror.  
Hann ehr gerot, wenne das ich menne,  
awwer de neie Hausbesitzer dun er a all kenne,  
uff de Stefan basse mer jetzt all e bißje uff,  
denn der hockt a schunn uff'em Bulldogg druff.  
Die Musik scheelt denne zwä net schlapp:  
„Claudia, ich hol dich met dem Traktor ab!“

Straußbuwe...

1994 nennt de Strasser Stephan famos,  
 was wäre mer ohne die zwäe Kerle bloß.  
 Üwwer die in de letschde Johre in Nerrermohr,  
 so manche Geschicht kam in unser Ohr.  
 Denn es Läwe besteht tagaus, tagein,  
 aus schaffe, schaffe, pünktlich sein.  
 Amme Owend konnt mer in Lautre sehe,  
 e junger Mann an sei Auto gehe.  
 Als er wollt ins Auto eninn,  
 merkt er, die Deer iss zu unn de Schlissel steckt drin.  
 De Georg net dumm, hat schnell iwwerleet,  
 bevor er dann zum Martin niwwer geht.  
 "Martin, mei Freund, Du helfsch mer doch, gell?  
 Ich brauch de Ersatzschlüssel unnn zwar schnell."  
 Die Zeit drängt, ich du net blaffe,  
 um zehn Uhr muß ich in die Opel ofange zu schaffe.  
 Um Vertel no Neun iss de Martin an de Ampel vorm Massa,  
 unnn um halwer Zehn in Nerremohr - wie e Pascha.  
 Beim dritte klingele reißt es Christine es Fenschder uff:  
 "Was issen los, komm doch eruff!"  
 De Georg meent, ruf noch in de Opel an,  
 daß ich heit owend e bisje schpäder bin dran.  
 Im Auto dann -- de Georg em Martin noch beicht,  
 daß sei Tankanzeige schunn lang uffleicht.  
 Schnell es Auto gehol unnn ab zum schaffe,  
 er kommt noch pünktlich o - doch de Mäschder muß lache,  
 veschwitzt, kabutt unnn abgehetzt erfahrt unser Langer voller Wonne,  
 daß er hatt gar net schaffe brauche komme !  
 Die Musik schpeelt dem Mann, oh weh.  
 "Es näkschde Mol schaff ich bei VW !"

Straußbuwe...

Ach, do iss e Geschicht, die iss werklich schee,  
 do wollt e Pärche uff Reise geh.  
 1997 iss das Malheur basset,

ess war de erich unn es Gertrud, hat mer geheert.  
 E Trip ins Amiland, das hoddense im Sinn,  
 awwer s'erscht missense mol in de Fliescher eninn.  
 Daß das net so schnell dut gehe,  
 merkense, als se vor de Gesichtskontroll stehe.  
 E paar warme Worte, dann nennt der Kontrolleur knallhart,  
 "Zeischense mol ehr beide Reisepässe her - un zwar sofert !"  
 E Griff in die Dasch, im Erich werds uff emol häß,  
 uff seiner Stern bild sich schunn de erschde Schwäß.  
 "E Nottelefon ! Ich muß es Helga erreiche !", hehrt mer ne fluche,  
 "Des soll däbber bei uns die ganz Wohnung durchsuche !"  
 "Hoffentlich find se denne zorliche Labbe,  
 sunscht muß ich un mei Fraa werrer serick zum Auto tabbe."  
 Dochs helft alles nix, ohne Paß geht's halt net weider,  
 sie schnappe sich die Koffer un gehn serick zu ehrer Schleider.  
 Dehäm in ihre traude Wände,  
 halt's Gertrud denne bleede Paß in Hände.  
 Es schlaat ne uff, es dreht ne rumm,  
 do merkts es Haltbarkeitsdatum is a schunn längscht um !  
 Wenn das so weitergeht met denne Eskapaade,  
 dann kenne die Indianer noch nächstjohr uff eich warde !  
 Das war's fers erschd emo! no der ganz Hatz,  
 der Traum vun Usa is vorerscht geplatzt !  
 Ehr Musikande schpeelen denne zwä net so wenig:  
 „Auf meiner Ranch, da bin ich König!“

Straußbuwe...

Doch die Kerweredd vorsjoehr hat all gut gefall  
 unn die Redd wurd vomme Märe gehall.  
 Mer Fraue sinn jo doch ess starke Geschlecht,  
 alle ehr Männer, gewwen uns schunn recht.  
 Unn an der Kerb kann mer net nur lache,  
 mer kriet a was beibrung vunn manche Sache.  
 Wer sich iwwer e Beipackzettel beklaat,  
 hert jetzt zu, was Lange Christine vorsjoehr hat gesaat.  
 SAT 1, Pro 7, RTL,  
 das hat mer alles ziemlich schnell.  
 Nur mol fix no Lautre fetze  
 unn sei Geld in e Sat-Anlach umsetze!  
 Doch die Montasch is kompliziert,  
 drum wird fleisch die Gebrauchsanweisung studiert.  
 Um kä Zeit me zu verliere  
 dut er die Klädele schunn uffm Klo montiere.  
 Ziehe Lasche A nach Hülse C,  
 verbinde E dann noch mit D,  
 greif Lasche B und ziehe vor...  
 PLATSCH, do leit das Ding im Rohr!  
 Jetzt soll mol ener locker bleiwe,  
 wenn die Däle in de Schüssel treiwe!  
 Dann muscht er a noch Klempnerawet schaffe,  
 em Frank war werklich net zum Lache!  
 De arm hat er bis zum Ellebo  
 drinngelast in seinem Klo!  
 Wie lange hat er dort gefischt,  
 bis er dieses Teil erwischt!  
 Unn die Moral von der Geschicht:  
 mit offene Bäa, do schießt mer nicht!!!  
 Die Musik scheppelt das Lied dohin:  
 „Du mußt den Nippel durch die Lasche ziehn!“

Straußbuwe...

Die Kerweredd heit mittag, die war ganz groß,  
das hann die Junge gemacht famos.  
Ich hoffe nur, so dann unn wann,  
daß mer a ess nächste Johr werrer Straußbuwe hann!  
Denn jetzt sinn 2000 Johr vorbei,  
unn es nächste Johr starte mer ins Jahrtausend 3.  
Awwer endlich bin ich jetzt am Schluß,  
daß war heit owend e harti Nuß.  
Jetzt wär vielleicht noch ens zu saan,  
hallen eich iwwer die Kerb so richtig dran.  
E jeder kann iwwer die Kerb soviel Geld ausgewwe wie er will,  
die D-Mark bleibt in Nerrermohr stabil.  
Awwer bewor ich mei Redd beschliesse,  
will ich de Strauß noch emol met Wein begieße.  
Du sollscht es ganz Johr iwwer hänke,  
daß mer noch lang an die Millenniumkerb zerick denke.  
Die drei Erschde mußte mer heit mittag schunn schwenke,  
die dunn ner uns heit owend schenke.  
Ich saan Tschüß bis zum nächschde Johr  
an de Kerb vunn Nerrermohr!